

թյունների հետ, բայց ավելի երկարատև և իրենց կազմակերպության էությունամբ արդեն չունենին այն մագիկ նշանակությունը, որը պահպանվել էր հայ բնակչության մեջ՝ ծագելով հայ ժողովրդի կազմավորման շատ վաղեմի ժամանակներից, երբ ոչ խառն, ոչ էլ փաշա է եղել:

Անպայման իր կարգադրություններին լիակատար հպատակություն պահանջող լիազոր իրավասությունամբ հանդես եկող երիտասարդ իշխանավորը թվում է, թե իր ելույթի մագիկ ներգործությամբ նպատակ ուներ արծարծել, արագացնել և դյուրացնել բնության մեջ նույնպիսի լիազոր իշխանավորի առաջ գալը, իսկ այս խաղերից հետո սարքվող քեֆը երիտասարդների կողմից բերվող մատաղն էր, որի նպատակն էր ոչ միայն կշտացնել, այլև խրախուսել հարություն առնող աստվածությունը, նրա ուրախ և բարի վերածնությունը³³: Խանին հատկացվող բացարձակ լիազորությունը թելադրում է մեզ այս խաղը համեմատել այն մագիկ միջոցառումների հետ, որոնց ուսումնասիրությանը նվիրված է Ջ. Ֆրէզերի հոշակավոր աշխատությունը՝ «Ոսկե ճյուղը» — «The Golden Bough»³⁴: Նա ապացուցեց բազմաթիվ օրինակներով, որ նախնական մտածությունը հատուկ է բնության ստեղծագործական ուժը արծարծելու և միշտ թարմ պահելու համար, թույլ չտալ, որ քուրմը, առաջնորդը, թագավորը, նա՝ ումը վերագրվում է անմիջական կապակցություն բնության բեղմնավորությունն արթնացնելու, ծավալելու և անսպառ պահելու հետ—ծերանա, հիվանդանա, մեռնի և դրանով նույնը առաջացնի բնության մեջ³⁵: Այդ նպատակով հիվանդացող, ծերացող կամ թուլության նշաններ ցույց տվող այդպիսի մեկը հեռացվում էր, մեռցվում էր և փոխարինվում էր առողջով, երիտասարդով, ուժեղով: Դրանով ապահովվում էր բնության առողջությունը և երիտասարդական թարմությունը: Բարեկենդանական խառն հատկացվող բացարձակ իշխանությունը գրգռելու էր արթնացող բնության նույնպիսի իշխանություն (մի գործողության մագիկ զորությամբ նման գործողություն առաջացնելու ուժ): Այն, ինչ որ նախնական հասարակության մեջ լուրջ մագիկ ծիսակատարություն էր, ավելի ուշ ժամանակներում, այլ մտայնության գերիշխանության հետ վեր է ածվել սոսկ թատերախաղի, հասարակական պարզ ժամանցի: Թատերախաղի գործողության բովանդակությունը ստանում էր և որոշ սոցիալական իմաստավորում, ինչպես և ազգային-ազատագրական պայքարի արտացոլում: Որ հնում այդ խառն մեռցվում էր, ինչպես Ջ. Ֆրէզերի նկարագրած դեպքերում, պետք է շատ հավանական համարել, նկատի ունենալով մի այլ նման բարեկենդանական խաղը, որը նույն մագիկ նպատակն ուներ, բայց վաղուց մոռացված էր Զանգեզուրի գյուղերից մեծ մասում և պահպանվում էր իր էական մանրամասնություններով Արծվանիկում: Այդ թատերախաղը կոչվում էր Հարսի խաղ³⁶: Այստեղ դերակատարները ոչ թե երիտասարդներ ու պատանիներ էին, այլ ավելի փոքրերը: Մի տղա հագնում էր հնարած զգեստներ, գլխին անպատճառ պիտի լինեին տղամարդու գդակ, մյուս տղան էլ զարդարվում էր ավելի որոշակի կանաչի զգեստով, որպես

³³ Այս բացատրությունը տալով բարեկենդանական Խան խաղերին, խնդրի ավելի բազմակողմանի լուսարանությունը մտադիր եմ դարձնել հատուկ ուսումնասիրության նյութ: (Հեղինակի մահը թույլ չտվեց նրան իրագործելու այդ մտադրությունը, ծան. խմբ.):

³⁴ Фрэзер Дж., Золотая ветвь. Аттестация, 1928 и 1931.

³⁵ Անշուշտ այս մտայնության հետ անմիջական կապ ունի և քրիստոնեական ավանդությունը՝ Քրիստոսի շարժարանների, մահվան և նոր ուժով հարության մասին:

³⁶ СМОМПК, вып. XXV, отд. II, էջ 48: